

նուազէ և տէր երկրիս¹ խոռ աչօք է ընդ ֆռանկս և ընդ դեսպանս. և եհան հաթթիշէրիֆ, աստ և յամենայն երկիր տէրութեան իւրոյ, թէ մի ոք ի յունաց, ի թաւաշից, ի հայոց և յայլոց ազգաց ռայէից իմոց բնիկ յերկրէ իմմէ եղելոց դարձցի ի կրօնս ֆռանկաց, և ընդ թեօք նոցա մտեալ և թէրճիման գրեցեալ ազատ համարեսցի զինքն, այլ ամենայն բնիկ ծնեալք յերկրի խաւրածս տայցեն, և սկսան կալնուլ զյոյնս և զթաւշանս զֆռանկացեալսն, որք և փոխեալ զզգեստս սկսան առնուլ խարածս. այս եղև ի դեկտ. 23: (Հ. Զաքարիա առ Մեղղոնեան, 1759 Յունվ. 19: [Կ. Պոլիս]):

մբ.

Լսեմք վասն սառաֆօղլու սարգիս վարդապետին լինիլ ի հիւանդութեան ի քիայ կղզոջ, որ է սախրզ. և դեռ յաքսորս է, և ասեն, թէ չիք նմա հնար դառնալոյ ի Կոստանդնուպոլիս: (Հ. Իգև. առ Մեղղոնեան, 1759 Փետր. 17. ի Կոստանդնուպոլիս):

մգ.

Այսմիկ շաբաթոջ սրբազան Պապն² Գառն Աստուծոյ օրհնեաց և բաժանեաց, զի 9 ամաց հետէ ոչ էին օրհնեալ. և սկիզբն ամսոյս այսորիկ եկն եհաս ի Հոսմ անտոն եպիսկոպոսն զպթոց ազգէ զոր աւելի քան զհազար ամ է ոչ ոք եպիսկոպոս այնմիկ ազգէ ի Հոսմ եկեալ էր. այլ ասեն այս է առաջինն զկնի եփեսոսի սրբոյ ժողովոյն ի Հոսմ դիմեալ: (Յովսէպ Եպս. առ Մեղղոնեան, 1759 ապրիլ 21. [Հռովմ]):

մդ.

Առի զգիր քո ցանկալի գրեալ առ իս ի սամաթիա քաղաքի մեծի մասին պարծանաց վասն երանելոյն [Տէր Կոմիտասայ] տապանի անդ լինելոյ մարմարիոն քարամբ քանդակագործ զարդարելոյ, և քոյդ աշխատութեան կցորդ և պատճառ գոլոյ:... Կարծեմ, թէ ի վաղուց հետէ լուր մահուան դաբուխան իրիցուն հասեալ իցէ յականջս ձեր. զի իբր թէ յանկարծ անհաղորդ մեռաւ. զիտես դու զնա, թէ զիարդ վերակացութիւն առնէր գերեզմանի երանելոյն, և զանձէր զգրամս հանապազ, և կեղծաւորէր առ երես ուխտաւորաց, պատմելով զվարս և զսքանչելիս նորա, և կատարէր զկարգ մարտիրոսաց: (Հ. Իգև. առ Հ. Մկրտիչ, 1759 յուլիս 19. ի Կոստանդնուպոլիս):

մե.

Ի տօնանմային քրիստոնեայք նորոգեցին զժամս իւրեանց. արդ՝ զպէշկըտաշու ժամն ոչ միայն նորոգեցին, այլ և փոքր մի մեծցուցին: Բայց ահա յաւուրս յայսոսիկ զայն ժամ պէշկըտաշու հրամանաւ թագաւորին ի հիմանց փլուցին տաճիկք վասն ոչ տալոյ հայոց չուխատարի միոյ զկըռծոնս, որպէս ետուն այլոց տաճկաց, և այն զի չուխատարն խնդրէր զմի քսակ դրամ: Եւ իբրև իմացան թէ չուխատարն արգուհալ է արարեալ թագաւորին վասն ժամուն, թէպէտ խաբճեցին իբր երեսուն քսակ, զի արգելցի բանն փլուզանելոյ զժամն, բայց ոչ կարացին: (Հ. Զաքարիա առ Մեղղոնեան, 1759 օգոստ. 1. [Կ. Պոլիս]):

1. Մոստաֆա Գ.:

2. Կղեմէս ԺԳ.: